

PEMBERITAHU PERTANYAAN DEWAN RAKYAT

PERTANYAAN : LISAN

DARIPADA : Y.B. Dr. Mansor bin Abd Rahman [Sik]

TARIKH : 18.03.2014

SOALAN :

Y.B. Dr. Mansor bin Abd Rahman [Sik] minta **MENTERI PENDIDIKAN** menyatakan berapa peratuskah tahap penguasaan Bahasa Inggeris meliputi penguasaan dan perkembangan di kalangan murid-murid di sekolah bandar dan juga luar bandar dan apakah usaha-usaha di pihak Kementerian untuk meningkatkan tahap penguasaan murid-murid ini terutamanya di luar bandar.

JAWAPAN

Tuan Yang di-Pertua,

Untuk makluman Ahli Yang Berhormat, secara keseluruhannya peratus murid yang melepasi tahap penguasaan minimum dalam Ujian Penilaian Sekolah Rendah (UPSR) tahun 2013 adalah 74.4% bagi sekolah kebangsaan (SK) dan 71.4% bagi sekolah jenis kebangsaan (SJK). Manakala di peringkat Sijil Pelajaran Malaysia (SPM), peratus murid lulus dalam Bahasa Inggeris bagi tahun 2012 ialah 78.1%.

Kementerian Pendidikan Malaysia (KPM) sentiasa berusaha memperbaiki penguasaan bahasa Inggeris dalam kalangan murid sekolah rendah dan menengah terutamanya di luar bandar. Antara usaha yang dilakukan adalah:

- i. Meningkatkan tahap penguasaan bahasa Inggeris murid pada peringkat Sekolah Rendah ialah melalui Program Linus 2.0 Literasi Bahasa Inggeris telah bermula di semua sekolah rendah mulai Jun 2013. Program ini mengenal pasti murid yang belum menguasai literasi Bahasa Inggeris dan

mereka ditempatkan dalam kumpulan khas untuk mempelajari asas literasi Bahasa Inggeris dengan lebih berkesan;

- ii. Melaksanakan pengajaran dan pembelajaran Bahasa Inggeris yang berfokus kepada tahap profisiensi murid melalui Sistem Set. PdP ini dilaksanakan di Tingkatan 1 bertujuan mengukuhkan tahap penguasaan Bahasa Inggeris di tahap menengah rendah;
- iii. Murid-murid sekolah rendah diperkenalkan sastera kontemporari kanak-kanak, manakala di peringkat sekolah menengah murid digalakkan membaca buku Bahasa Inggeris melalui Komponen Sastera Bahasa Inggeris (KOMSAS);
- iv. Memperkenalkan Program *Fulbright English Teaching Assistant* (ETA) sebagai satu inisiatif meningkatkan penguasaan Bahasa Inggeris dalam kalangan murid di luar bandar. Program ini disasarkan di 100 buah sekolah menengah dan rendah di luar bandar di negeri Terengganu, Pahang, Perak, Johor, Sabah dan Sarawak yang dikenal pasti mempunyai pencapaian yang rendah berdasarkan Gred purata mata pelajaran (GMP) Bahasa Inggeris dalam UPSR / SPM yang rendah iaitu 4.00 – 5.00 bagi UPSR dan 6.50 – 9.0.0 bagi SPM;
- v. Meneruskan pelaksanaan Program Penutur Jati Bahasa Inggeris. Seramai 295 orang penutur jati telah melaporkan diri pada Januari 2014;
- vi. Melaksanakan SPM *English Language Initiatives* di 1191 sekolah *hotspot* (Band 3 hingga 7) yang dijangka mulai Julai 2014; dan
- vii. KPM juga akan menerima seramai 90 orang guru Bahasa Inggeris dari negara India (ELTI) dijangka mulai Julai 2014, yang berperanan memberi *coaching* dan *mentoring* serta melatih guru-guru Bahasa Inggeris bagi meningkatkan penguasaan Bahasa Inggeris dalam kalangan murid-murid.